

重修兩淮鹽法志

兩淮鹽法志卷五十九

轉運門

緝私

鹽法莫重於疏銷莫要於緝私

國家二百數十年初行綱法繼行票法法未嘗不盡善而私不能盡絕今試言之產鹽之地則有竈私場私重斤夾帶影射出江之私淮北引界則有蘆私潞私淮南引界鄂湘西皖則有川私粵私浙私閩私應私岱私有本省之私有鄰境之私凡運於此而侵於彼皆以私論長江上下復有釣船輪船礮艇之私皆害於官引此巡緝

之不可不密禁令之不可不嚴也爰采

國初迄於今舊制新章釐爲六冊以備考核云志緝私

順治十六年二月戶部議准兩淮巡鹽御史高爾位請鹽船當用火印一款查船頭用印民船鹽船各有分別事屬便商應如所議又私鹽公行一款查回空糧艘夾帶私鹽應令關津滿漢各官盤驗放行遇有私鹽卽移文巡鹽御史指名題參

順治十七年三月兩淮巡鹽御史李贊元疏言回空糧船約有六七千隻皆出瓜儀二閘一幫夾帶私鹽奚止數十萬斤合而計之實侵淮商數十萬引鹽之地爲害甚

大查漕規回空利於速回以便早赴下運如此夾帶私鹽必致耽延時日害鹽法並害漕規乞令該督撫轉行漕道申飭禁緝發賣之地先窮其源所過之處嚴察其弊庶於鹽法漕規兩有裨益戶部覆准如有回空漕船仍前擅將私鹽夾帶並違禁收買者該地方官與押空等官一體參處漕道嚴檄押運等官親自押行不得因循滋弊違者亦一體參處並令該巡鹽御史於回空過揚州鈔關時逐船查驗如有仍前夾帶者必追問其收買何地卽將該地方官與押空等官指名題參從重議處不服查驗者加倍治罪

順治十七年四月巡鹽御史李贊元疏言鹽政壅弊之由
一在各省越販侵疆臣確訪私鹽來路大抵廣東私鹽
由南路運過梅嶺直抵九江西路從各水透之衡州轉
之武昌福建私鹽由八水關販至饒州浙江私鹽自廣
德梅渚並泥水東壩越界至蕪湖河東私鹽越河南至
襄陽徑往下江淮北私鹽犯界直至岳州請行各驛鹽
道務於各該屬地方以佐貳一員兼管巡緝私販或事
關勢豪不能彈壓報臣衙門題參定奪至於越販行私
卽按律究擬就近呈請驛鹽道衙門必究其鹽所從來
是何窩家經紀所過地方有無徇縱情弊不許止以肩

挑背負貧民塞責各道果能率屬有方越販屏絕臣特
疏薦聞如督率不前縱役需索臣立即題參議處一在
清理近府州縣私販防之各處不若嚴之於扼要之地
以絕其源淮北板浦場離惠澤巡司八十里乃淮北引
鹽出場門戶私鹽借流陽食鹽爲影射載囤高家溝湖
泊之中踵越清河桃宿驛入廬鳳池地不可數計故淮
北私鹽從安東海州而出四通八達淮南私鹽從高家
壩而出直抵泗州從秦壩而出江河萬派如徐濱臨洪
二場私鹽出沒首在海州板浦以南新壩新安等鎮皆
私鹽往來必由之地其責在安東縣高秦二壩乃係禁

緝之咽喉泗州一橋尤屬稽查之要地此數處者皆販私之源請定例遇有私鹽必究其鹽所從來所過州縣衛所巡司等處曾否盤詰有無徇縱窩囤何家經紀何人詳細申報臣卽將經過地方受賄徇縱之捕役立刻嚴拏知情故縱之官員照例參奏一在職守不專巡緝不力查禁私疏壅緝囤通商責在各府州縣有司惟知田畝民賦爲專任鹽法一事多略而不講請嗣後每府州縣於佐貳中選責一官以司其事專設巡役於該管地方力爲巡緝凡道府州縣不得差委員役以滋擾害至其所獲私鹽許報明本府州縣府州縣卽申詳臣衙

門究擬仍按季彙填臣按簿以爲殿最果能實心禁緝
不靳優獎擒獲大販積窩亦必特疏薦聞如有因循怠
玩一任私販公行者立刻題參均經戶部覆准

康熙三十七年十二月巡鹽御史卓琳題准令漕運督臣
每年於江廣糧船回空之際選委漕標賢員臣亦揀選
能員協同搜查押出江口誠恐旣入瓜儀另行私運上
船請令龍江蕪湖湖口三關一體盤查如有私鹽該關
卽報督撫並臣衙門合同題參

康熙五十六年八月部議覆准巡鹽御史李煦會同蘇撫
吳存禮鎮海將軍何天培提督杜呈泗疏言江都縣境

內三江營地方於鹽場甚近私鹽會集於此且逼近海口防範宜嚴江防同知本有巡江責任駐劄江甯離此寫遠請移衙門於三江營彈壓免其解餉押運

康熙五十七年十月兵部覆准巡鹽御史李煦疏言揚州府江都縣境內三江營地方倚棍搬運私鹽必得汛兵爲之聲援方免透漏雖有京口水師營分防汛兵爲數無多不敷應用臣咨商京口將軍其派目兵一百五十名交千總一員帶赴三江營地方其應支糧餉仍於本營支給外所有巡役人等工食與蓋造衙門房屋俱係商人捐給不支正項錢糧所派弁兵聽該同知鈐束調

遣

康熙六十年十二月奉

旨聞得江浙私鹽盛行盡爲盜賊地方官員明知並不查拏應著江南浙江京口將軍等派兵嚴行查拏欽此大學士九卿詹事科道等會議題准查從前九卿會議竈丁人等私煎私賣及奸宄之徒興販私鹽將失察之地方文武官員俱定有降職降級革職處分其拏獲倚棍私鹽千觔以上者將該管官紀錄後有失察准其抵銷如有不肖官員貪其紀錄將貧難軍民肩挑背負易米度日之人及外來貿易貧民混作私販倚棍查拏者照例題參今

江浙行鹽地方遼闊若令官兵在一處查拏不能遍緝
江南京口地方應交與江南京口將軍每處揀選賢能
協領各一員佐領防禦等各八員兵丁酌量派出各分
明地方除窮民肩挑背負小販照例不行查拏外其大
夥私販嚴行查拏如有拏獲者卽交地方官送按察司
衙門審明照律定擬並將爲首賣私之人一併治罪係
何地方緝獲該督撫卽照九卿原議定例將失察之該
地方官員指名題參若督撫徇隱不行題參卽將該督
撫一併交部議處所派官兵若不盡心查拏或借端擾
害或將拏獲真實私販之人受賄釋放等弊該將軍卽

指名題參交部從重嚴加議處如有能拏獲大夥私販
一次者准其紀錄一次二次者加一級該督撫等不時
稽查如有不將偷販私鹽之盜賊緝拏混行生事者亦
卽行題參仍行令兩省督撫提鎮等嚴飭各該管地方
文武官員亦遍行查拏如有外境奸民私藏地方興販
者地方官卽按里甲查明遞回原籍如仍前怠玩不行
查拏將該督撫提鎮地方官員一併交部照例議處其
地方文武官員議處議敘之處俱照從前九卿原議定
例遵行

雍正元年十二月和碩怡親王交出條奏言從前九卿議

添滿營官兵查緝私鹽恐不法營兵借端生事而商費又添一倍請行停止奉

上諭令兩江浙閩總督將軍等各陳已見到齊合議具奏欽此
王大臣會議題准據兩江總督查弼納請停滿營官兵
緝拏江甯將軍永吉納署理鎮海將軍李杕請照常交
與旗兵查長江自京口至湖廣江西等省鹽俱出於江
海交會之所私鹽大船從此偷行者多大夥鹽梟常在
海州鹽城等處聚集若不於揚子江之三江口瓜州揚
州口截江巡查則大夥私梟斷不能除京口將軍管下
兵丁既有船隻可截私梟又可熟識水性應如李杕所

奏江甯將軍永吉納雖稱照常但總督查弼納既稱現
今江甯境內私梟甚少請停滿營官兵嗣後如有大夥
私梟再轉行將軍發旗兵協捕應如查弼納所奏

雍正六年五月浙江總督兼理兩浙鹽課事務李衛題覆
言江南督臣范時繹兩淮鹽臣噶爾泰議稱私梟窩固
已經會題舉行十家連坐之法如一甲之人不行出首
致旁人首告者其甲長及同甲人等一併治罪私鹽變
價賞給首人挾讐誣首者仍行反坐每逢朔望日十家
長各出互結保正窟頭加具保結呈送州縣場司每季
加結照例申報倘有私梟事發究其興販是何地方買

自何場該州縣場司照例處分本犯從重律擬甲長地鄰竈頭分別治罪臣查私梟窩固難瞞甲鄰此必然之理但連坐之法惟當就兩鄰甲長嚴治其罪足蔽厥辜若因一人而株連及於同甲之十家未免罹於法網者繁且恐畏罪朋比隱匿難以稽查應請尋常興販止治兩鄰甲長以不首之罪若大夥窩固聚眾拒捕者將首犯之同甲一併連坐餘條仍如原議出首者以私鹽變價分別賞給嚴飭實力奉行十家長同保正竈頭相應停其朔望投結止於每季具結一次以便竈民營運又議稱兩淮所屬之三江營力乏橋衡陽等處向爲鹽梟

盤踞之所已將江甯府江防同知移駐三江營彈壓又照舊例分撥各營千總帶兵駐劄緝拏至今斂迹應仍照舊例題請飭令各口岸地方文武官弁嚴加緝捕則官役自不致受賄縱私應如所議又議稱兩淮止有貧難小民許其負鹽四十斤並無老幼之分應照浙例於貧難小民內六十歲以外十五歲以內及殘廢者許其於不銷官引地方負鹽四十斤易米度日如在銷引地方販賣者卽同私販一體查拏臣查貧難小民許背負鹽斤易米度日此

聖朝矜卹深恩應請如議照舊准行仍嚴飭地方官督率鄰甲

人等加意稽查如有於額定四十斤外私相買賣又或假託肩挑背負運送窩囤合成大夥私鹽等弊該地方官立即嚴拏照私鹽併數律擬論罪其鄰甲竈頭人等不行查出一併治罪至於兩浙雖有六十歲以外十五歲以內許其負鹽易米之例但此中年歲多非真實且鄉民自幼正當使之力田服農若令習熟賣鹽之事誠恐久慣自然不能改業兩淮既向無此例應無庸分別年歲又滋弊端至於兩浙近場縣分向係票引給與肩販行銷今查兩淮向無票引肩販惟江都上江等八縣每年俱額銷淮南食鹽之引商人專售城鄉市鎮各鋪

戶銷賣較之肩販稽查更易爲力所當仍循其舊不必
紛更部議均如所請行文該督撫鹽政遵行

雍正六年十一月江南巡察御史戴音保條奏鹽務一豪
棍之窩頓宜究也聞淮南及通泰二州近場各鎮皆有
豪棍挾貨平日收召亡命船載驟駝賤買堆積一俟糧
座等船北下或泊無人之境或約昏夜之時連幫裝載
從此出江直達江廣所在兵役見其船多人眾力不能
敵雖奉公搜查亦虛應故事請飭地方文武密拏窩頓
之人從重治罪並取里甲甘狀如有前項窩頓之家
甲一體治罪相應行令直省各督撫暨巡鹽御史除照

戶部原議設立保甲稽查私販窩頓分別治罪外仍轉飭沿河文武各官嚴密查拏窩頓及糧艘私行販運審出實情照例治罪如該地方官容隱不報被前途查出或沿途不行查出及至糧座販至他省貨賣始行發覺將隱匿不報及沿途失察各官一併查參議處一巡防之要害宜悉也蘇松常鎮四府向食浙鹽自有淮私透漏而浙引遂至壅滯今議於京口地方嚴加搜查固爲得要然先當絕其所出查淮鹽三十場竈在在皆有港汊出江而三江營爲其總匯是以近年移駐江防同知於此招募鹽快抽調兵弁令於江面上下游巡原使淮

私不得飛渡南岸是必該同知駐劄三江營親加督率
方能有濟今聞該同知賃居揚州離本汛數十餘里此
地一有懈弛偷渡南岸凡鎮屬各口及常屬之孟河江
陰等處皆可直達雖京口官兵有備而防於彼者勢必
逸於此請飭令該同知仍歸三江營衙門居住使場鹽
不得出江如有江汛上獲者定一內地文武失察處分
如江汛上不能捉獲偷渡南岸被鎮常各屬查拏者卽
嚴定三江營同知失察處分營兵捕役痛加責革則人
自爲守而淮私不得混入浙界並令江南督撫及浙江
總督嚴行文武地方官於淮揚一帶港汊凡可出江之

處分頭搜緝務使私鹽不得出江偷渡嗣後私鹽如有
在江汛上拏獲者該督撫查明係何州縣管轄卽將該
地方文武各官指名題參照例議處至三江營同知旣
有專管鹽務之責其議處亦照專管地方失察之例如
有賄縱情弊以枉法科罪若緝私有效分別獎勸以示
鼓勵一承審推求宜實也淮揚一帶有捉獲私鹽批發
府廳州縣審問者究所從來非云米易卽將柴換非云
水次卽云路旁總無著實承審官每據供詳報其間重
者枷責輕者薄懲而已其弊總由竈戶窩家向與私販
之人通同一氣不得不代爲隱諱請飭令承審衙門務

加研訊若私鹽出自竈戶窩家按律嚴拏則販者賣者皆知畏懼部覆如所奏行

雍正十年二月兩江總督高其倬奏覆署理鹽政伊拉齊以文武員弁原皆有緝私考成邇來漫不經心一任巡役賣法如湖北則受川私之侵湖南則受粵私之害經大學士蔣廷錫議覆應行江南江西湖廣各該督撫提鎮通飭所屬實力查拏倘或仍前玩忽被兵役朦蔽賣放於別地方發覺者該督撫卽指名題參按例議處至所稱稽查官引越俎滋擾查商人亦間有影射夾帶等弊地方官員未便禁其稽查但或有借名需索者應令

內江監法云 卷五十一
伊拉齊立卽題參治罪部覆如議行

雍正十年四月署理兩江總督總理鹽政尹繼善檄行運
司言兩淮私鹽充斥業經通飭各屬一體查緝但州縣
向無巡役必得另行招募酌給工食方爲有益查存冊
內淮南有巡緝存銀五千兩又運司項下巡緝三千六
百兩京口巡緝一千三百五十兩三江營遊巡一千八
百兩沙漫洲巡船八百兩淮北山陽清河承差巡緝二
千七十兩海州贛榆承差巡緝二千六百兩此等巡緝
之費均可爲設巡工食之用但不識各款內何項已提
充節省何項見存作何費用再據淮南商人冊開各場

設立巡商巡役巡船共費銀五千四百餘兩此項是否
卽係存冊內之銀或係商人另行捐給又江都甘泉二
縣巡費一千七百餘兩聞原在綱商一萬二千之內今
已經商人另捐此外有無設巡之費准北商人有無在
各處設立巡商巡役所費若干合飭該司會同分巡鹽
務道逐一查明通盤核算將向來所設巡商及火伏委
商盡行裁革見在所設火伏竈長竈頭巡磨等項是否
妥協有無應減應裁及應行另設之處詳悉籌畫鹽務
道衙門一切浮費一併清查據實節省合計火伏項下
頭長巡磨等項及鹽務道衙門應給書承隨役巡快船

隻等項每年共需銀若干外其餘巡費若干即可爲州縣設巡之費應將某州縣某要隘幾處應設巡役若干名每名每月應給工食若干水路應設巡船若干隻除見有船隻外應添若干每船頭舵水手若干名應給工食若干船隻每年歲修銀若干巡役應備器械銀若干計需所餘巡費如有不敷酌議添補其每州縣設巡不必一律均勻惟視其緊要地方私鹽經由隘口至所設巡役應令州縣選募殷實農民並令該州縣加具保結呈送存案其商人先募之巡役令州縣驗看可用者留不堪用者卽行革退嗣經運司范廷謀等詳議分別應

裁應留並定淮揚二屬州縣場司共設巡役四百六十
四名巡船八十九隻舵工水手一百八十六名歲給工
食燈油火藥修艚銀一萬九十八兩以裁減火伏工費
屯船充公等銀六萬餘兩充用繼又陸續添設青山三
江等營官兵俸餉及各口岸巡緝官役

雍正十年運使范廷謀詳揚州府屬地近鹽場例不銷引
惟江都一縣額行鹽二萬六千七百十引原爲綱食口
岸之藩籬緝私第一要法則在查送屯船蓋屯船有不
得不停泊之處如灣頭非候水性不能上閘北橋非候
放橋給旗不敢開行揚關非候鈔完查訖不能過關此

停泊之時卽其偷爬之候今據商人王永泰等呈請自宜陵至三汊河自邵伯至灣頭一帶設塘十處無分晝夜常川巡緝又委諳練總商帶領巡商二名分巡查察查屯船偷爬乃江都商人切膚之害又該商等生長此地隘口弊藪久所熟悉以熟悉利弊之人務去切膚之害其盡心竭力自與尋常之兵役不同應請撥費令商自行巡緝經兩江總督尹繼善鹽政高斌批允

雍正十二年兩江總督尹繼善題准儀徵縣之青山頭濱臨江口各處梟販雲集實爲查私第一要隘應於此地立一專營設守備一員把總一員外委把總一員

兵一百名巡船四隻於水陸隘口上下巡緝庶江廣口岸可免私鹽偷漏又江都縣境內之馬家橋甘泉縣境內之邵伯鎮北壩僧道橋爲私販下湖之總路應各設把總一員兵三十名以資巡緝又揚州缺口門外向設搜鹽廳一所查糧座艚艍等船甚爲扼要向來惟鹽快十餘人虛應故事經臣輪派試用候補官員駐劄並委揚州武弁一員協同稽查甚爲得力嗣後永以爲例庶盤察更爲嚴密再淮北地方遼闊如場關爲各場門戶大伊關爲水陸要區永豐壩爲盤查隘口烏沙河係引鹽停泊之所湖口乃各船收私之處泗州天長兩關係

口岸必由總路均屬查私喫緊關鍵向來無人管理任
意疏縱應選勤幹佐雜管理但淮北去鹽臣遙遠一切
所壩場關事宜應就近責成淮揚道督率其淮北督緝
事宜仍令淮揚淮徐二道各按所轄分管則總理分任
各得其人部議均如所請行

謹按大伊關委員於乾隆九年裁汰

雍正十二年於淮南批驗所南黃泥灘鐵鶴子二處總口
各設巡船二隻巡役四名委員督率凡商運駁船出口
掛號驗票盤查子鹽數目相符始准放行以杜透漏影

射

雍正十三年三月管理鹽政高斌敬呈鹽政要務各款

一鄰省借官行私之弊宜除也查銷引官店自應開設城鄉市鎮人煙稠集地方以便本境人民買食今浙閩川粵及長蘆之商乃於淮鹽接界地僻人稀之處廣開鹽店或數座至數十餘座不等多積鹽斤暗結梟徒勾通輿販是私梟借官店爲國戶鹽店以梟棍作生涯仰懇行令河南浙閩川粵各該督撫通飭地方官將接壤處所開鹽店逐一嚴查其有應留一二店以備本地民食者酌量存留其餘鹽店悉令改撤於城市開張倘有仍前勾梟販私卽嚴拏從重治罪部議浙閩川粵及長

蘆各商於淮鹽接界地方廣開鹽店暗結梟徒興販應
交與各該督撫實力查拏按律究治倘不嚴行緝獲怠
玩縱私將該管各官一併交部嚴察議處至所稱將接
界鹽店移置城市之處查浙閩川粵及長蘆等處銷引
官店開設已久在城在鄉原屬因地制宜一旦令其移
設城市則向之分設各地方者會聚一處未免紛擾且
恐鄉民無知祇圖私鹽價賤不肯遠赴市城而奸宄之
徒借此更易於行私轉致引壅課絀應令各該管鹽督
撫鹽政詳加酌定具題到日再議

謹按嗣經浙閩總督郝玉麟浙江巡撫程元章兩廣

總督鄂彌達長蘆鹽政三保均以所設官店已久商民兩便應仍照舊開設毋庸移改具題部議覆准飭令各商各銷各引毋致躐越

一湖廣鄰私要隘宜委專員督察也湖北界連四川湖南界連兩廣每多私鹽侵越向於湖北之彝陵州及湖南之衡州等處各設總巡商一人督率巡役守禦各處隘口緝拏私販但巡商非見任職官可比須得本省委官督察協辦方爲周密如地方有掣肘之處巡商力量所不能行者該員即可移會地方官並詳報該管上司便於舉行不致阻撓稽延其巡役內有怠玩縱私或生

事滋擾者卽可彈壓稽查分別究革至各隘緝私事宜有應隨地隨時酌量辦理者該員又可詳稟督撫鹽政酌行是委員督巡實與緝私有益請令湖廣督撫在於湖南湖北兩省內各揀選勤幹之府佐一員擇其適中緊要地方飭令帶領本衙門原設人役移駐一應緝私事宜率同巡商悉心辦理果能督緝有方著有成效三年之後題請從優議敘仍令鹽道不時查察倘該員徇私廢公借端需索卽據實揭參該道徇隱不揭一併議處部議如所奏仍將委員姓名報明吏部查核一鹽案審究查參之宜申嚴也梟徒違禁販私本無可

寬全在平日勤加督緝事發嚴行究懲庶幾梟徒知所
戒懼至文武員弁均有緝私之責所以定例失察加以
處分拏獲予以議敘分別功過而昭勸懲法至善也但
鹽犯狡黠到官必飾辭諉卸避重就輕若承審之員草
率審結不惟縱惡長奸無以示警更使失察之員倖免
處分拏獲之員未邀議敘有失立法勸懲之本意應請
嚴行申飭部議均如所奏

乾隆元年五月署理鹽政尹會一等題准前接部文欽奉
諭旨寬恤貧難實拏奸商大梟停止私雇捕巡臣卽欽遵分別
辦理茲因天津一帶無賴棍徒販私騷擾經直隸督臣

李衛摺奏部議地方情形必須各該督撫鹽政因地制宜斟酌盡善行令悉心妥議查兩淮濱海貧難小民負鹽度日無分年歲惟不許在銷引地方販賣並令該州縣於城市鄉村各地方查造實在貧難小民花名年貌俱經奉部覆准應請仍照舊例遵行惟兩淮地方水陸叢雜其陸路向有車輛頭匹馱載販運鹽斤盈千累百應與水路之船裝一併嚴禁其年少婦女孤行負賣有關風化亦應照浙省之例禁止再人眾則易生事端鹽多則利於販囤嗣後貧難合例之人亦止許各自挑負易賣不許結隊成羣湊合與販如過三人以上藉口貧

難合夥騷擾仍行查究至巡役一項前奉部文卽經查明兩淮地方商人私雇者甚少間有一二處委係緝私所必需均應照舊存留

乾隆元年六月兩江總督趙宏恩咨部查漁戶領票赴買之鹽除海分司所屬場分歷來並無海關照票亦無完課之處外所有通泰二分司所屬各場每逢漁汛之期沿海居民雇備船隻先赴海關投納船稅請領照票本關驗明該船梁頭尺寸九尺以上爲大船八尺以上爲中船七尺以上爲小船票內填定舵工船戶姓名並大中小尺寸漁戶執票赴場場司驗票大船給鹽三千斤

中船給鹽二千斤小船給鹽一千斤漁戶買鹽出洋採捕汛畢歸港報明場司查驗該船得魚若干如魚少鹽多卽令將餘鹽歸垣售商如魚多鹽少該漁戶卽投醃切牙行照魚數買鹽復醃仍照魚數於狼鎮投納餉稅然後裝赴江南貨賣此外並無完納別項課銀再報稅用鹽俱以鹽數之多寡爲憑此等船隻乘潮雲集赴場則多報魚數希圖混冒鹽斤赴關則少報魚數希圖脫漏稅課關場官役勢難盤查實數每多受其欺朦應飭令各場員每年汛畢漁戶進港該船報明捕得魚數一面查核用鹽之多寡一面將各船魚數咨呈狼鎮收稅

衙門如少報魚數聽收稅衙門查究則漁船不敢捏報
冒鹽亦不敢減數漏稅經戶部咨覆准行嗣於四十年
兩江總督高晉等批准運司邊廷掄等會詳呂四場沿
海竈民出洋捕魚有初汎二汎三汎其領票赴場買鹽
如照額定價數概於初汎全給設魚少鹽多勢必查繳
歸垣迨再欲出捕又苦無鹽可領請嗣後大船應用鹽
三千斤者初汎給鹽一千五百斤二汎一千斤三汎五
百斤中船應給鹽二千斤者初汎給鹽一千斤二汎七
百斤三汎三百斤小船應給鹽一千斤者初汎給鹽五
百斤二汎三百斤三汎二百斤倘各船有二汎三汎不

願出捕者亦聽其便仍責成分司每年春秋採捕之時親詣督察儻大使奉行不善卽分別揭參其餘八場除角斜石港向無漁船醜切外所有柘茶豐利掘港金沙餘西餘東六場與呂四情形相同詳明督撫鹽政一體遵辦復於四十一年通州分司陳炯詳出海採捕漁船向例按船隻大小由海關填給照票赴場驗掛鈐印按數發鹽汛畢歸港仍投場查驗鈐印餘鹽售商入垣今漁船汛畢每有不赴場報驗鈐印者其有無餘鹽無憑稽察請移咨海關嗣後漁船繳票如驗無兩顆場印者卽行查究經運司邊廷掄移明海關查照

乾隆三年四月部覆兩江總督那蘇圖咨江西建昌府屬
之新城縣界連閩省私鹽透漏淮引難銷查飛鳶爲陸
路要隘石峽爲水路要隘應於飛鳶地方建立汛地將
蜂窩兵丁六名裁併再於樟村汛分撥兵丁六名共十
二名以資堵緝至石峽汛舊設外委把總一員帶兵十
二名防守今爲往來咽喉應將瀘溪汛外委千總改撥
石峽將郡城兵丁抽撥十二名與原設兵十二名共二
十四名以資彈壓其瀘溪縣汛卽令見防石峽外委把
總前往防守所需建造塘房工料銀兩於兩淮屯船充
公項下動支

乾隆七年七月運司朱續暉詳准高涇縣之永甯鄉毘連
宣城地界唐昌安興遊山立信四鄉地連溧陽建平浙
私侵越設立巡役三十二名責令該邑巡典各員就近
督巡並令把總會緝該縣設簿提比嗣於二十四年因
販私奸徒見巡役俱在陸路查緝往往假捕魚爲名駕
舟遞送以致傍水村莊皆食私鹽又於立信鄉之侯門
渡永甯鄉之錦秀菴各添設巡船二隻水手四名巡役
四名卽於額設巡役三十二名輪撥三十二年添設巡
商一名督役梭巡三十八年又增募巡役十名設卡鄧
埠北橋以資堵禦

乾隆七年十二月江西驛鹽道陳浩詳定吉安府萬安縣之阜口與贛屬毘鄰爲粵私侵越扼要吉水縣之桐江與峽江交界爲省私浙私入境隘口應飭商各立水卡各設巡丁八名巡船一隻以資堵緝其廬陵縣水東卡乃係查緝陸路粵私之出張渡籐田二處者亦應照舊設立無庸裁撤

乾隆八年八月江西巡撫陳宏謀以建昌府例食淮鹽因地近閩省私鹽充斥官引難銷檄行查議可否照南贛銷粵鹽例責成地方官領引分售九年運司朱績暉詳定以各縣領鹽按照戶口官爲督銷滋擾閭商民均

有未便從前公輪提鹽因無專辦之人是以行運不前
今請復循輪例責成匣商就近舉老成諳練商人獨辦
每年約撥三千引按季提運七百五十引在建郡設店
銷售減價敵私每引於省埠津貼銀二兩以資運費所
提鹽引及津貼銀兩係通商派湊不致偏累其售價彙
繳省埠分給本商按向行成規參以時宜提運定有專
人既不若從前輪運渙散費引出於公湊並可免將來
匱乏阻輟公共口岸公幫辦濟民食無虞藩籬始固

乾隆九年九月鹽政吉慶以各場通竈港汊甚多均係偷
漏私鹽之徑應否止留場河一道以通船隻餘俱用木

椿欄隔其沿河總要處所亦設木欄派役巡查啟閉使私鹽不能飛越竈鹽盡歸商垣檄飭運司查議旋據運司朱績暉查明除防禦已密及不通舟楫處所無庸置議外通屬角斜場之復興橋係船隻往來總口石港場之崔家橋東通煎竈西達運河西亭場之太平橋直達通州金沙場之袁竈港進鮮港皆係通沙通江之路又場西有港汊一條亦可直達通州餘東場之便民港南至大江中有沙地均爲透越要隘應共設木欄七座撥役專司啟閉鹽城縣所屬支河環繞港汊紛歧俱係私鹽出沒之所雖向設巡役駕舟巡緝不能一無疏漏應

請於興鹽界河九曲河北鹽河大岡河頂岡河柏家巷
鶴二灣鐵屎灣八處添設木欄八座卽令各該鄉保啟
閉稽查實於巡防有益經鹽政吉慶批允

乾隆十年十月兵部覆准署兩江總督尹繼善咨江西戴
村一卡居德興之香屯下游乃徽廣要津實私販咽喉
委饒州營守備帶兵十名遊巡所轄兵弁就近操練

乾隆十年十一月鹽運使朱續暉會同淮揚道陳法詳定
秦屬場鹽出口各有不同如東臺何垛梁垛三場則由
慈郎殷莊而出丁谿草堰小海劉莊伍祐新興廟灣七
場則於海道口亦從慈郎殷莊而出富安安豐二場則

由大尖而出總會於青浦角口再由溱潼獨樹馬家壩
祝家莊私鹽港口淤溪天齊廟而至秦壩交卸或一百
二三十里或二百八九十里向未設巡鹽船在遠不無
逗遛偷爬濟梟之弊今查青浦角殷莊時堰大尖和家
莊溱潼淤溪七處非各場出鹽之總口卽蕩湖通港之
要地非私鹽出沒之鄉卽黑夜藏奸之處若每處添設
商巡船役往來巡緝再令場員設立滾單按塘撲截逐
節催趨不使引船稍有逗遛則偷爬濟梟之弊無所施
技應於七處各設巡商一名巡役三名巡船二隻水手
四名自天齊廟至秦壩一帶梟棍更多尤宜嚴密應設

巡商一名巡役七名巡船四隻水手八名外再添遊巡四名巡船二隻水手四名均聽泰壩官約束應需巡役巡船查鹽務道改隸淮揚道管轄其巡役核定分隸之外尙餘三十二名相應撥入工食照原額支給此外不敷於停支淮所監掣及大伊關等薪水工食項下撥用

謹按青浦時堰殷莊大尖四塘商役於乾隆二十三年裁改

乾隆十年十二月江南淮揚道詳准京口水師營設立巡船三隻舵水十五名以資緝私

謹按嘉慶六八兩年運司以船身改造寬長詳添水

手三名

乾隆十一年十一月江西鹽道移據饒州埠商稟饒屬各卡商役分別增除冊開鄱陽縣小港灘卡巡商一名巡丁二名水手一名縣快一名餘于縣瑞洪鎮卡巡商一名巡丁十二名縣快二名水手二名樂平縣段村卡委官一員兼巡瑞洪卡書辦一名巡丁十二名戴村卡委饒州營守備一員巡兵十名巡商一名巡丁四名浮梁縣景德鎮卡後改爲東港卡馬鞍山卡巡商二名巡丁二十名兵丁十名水手三名安仁縣陸家埠卡巡商一名巡丁十名縣快二名水手二名德興縣香屯卡委官

一員巡商二名巡丁二十名水手八名春夏水漲添雇水手四名兵役四名饒埠總巡商一名巡丁二名遊巡商一名巡丁二名縣快一名水手三名

謹按總巡商一名於乾隆十九年裁汰四十年添設馬鞍卡巡商一名

乾隆十七年八月鹽政檄行運司言儀所天池等處爲鹽船停泊過掣捆裝之所每多地棍梟徒偷爬回販從前曾差健快阜舍等役前往查緝嗣經停止今查儀所仍有偷鹽地棍逞兇打降似該處巡役人少不敷防範應照前例酌差健快二名舍人一名阜役一名實力巡查

乾隆十九年四月運司盧見曾等詳准泰興縣原設外江巡船六隻因改造寬大添設水手於淮揚道衙門所設義禮智信元貞六船舵水內各減一名共六名卽添爲泰邑外江六船之用

乾隆十九年四月運司盧見曾詳儀徵縣一餞港沙漫洲新河口鐵鷁子三棵柳黃泥灘等處爲引鹽駁上江船要隘子包每多被竊經奇兵營選撥弁兵往來巡緝凡有一切艚艍小船黑夜無許潛傍駁船以免偷竊之患請添設划船一隻舵工水手三名經鹽政吉慶批如詳行

乾隆二十三年六月運司盧見曾詳六合縣東南濱臨大江與江甘儀徵接壤北與盱眙天長連界私販每易透漏向雖撥役巡緝而地方遼闊未免顧此失彼請於東南岳子河瓜埠各設巡役八名正東之太平集十二名猴子鋪四名東北之樊家集八名馬頭山四名正北之唐公山八名馬家集四名共設巡役五十六名河路設巡船二隻水手四名再添巡商二人以資查緝仍飭該縣督率千總捕巡等官一體協查經兩江總督尹繼善鹽政高恆批允飭遵

乾隆二十三年六月鹽政高恆批准運司盧見曾等詳奏

屬廟灣新興伍祐劉莊草堰小海丁谿何埭東臺九場
鹽船總由東臺向西入殷莊汛由時堰過青浦角至泰
壩富安安豐二場鹽船由大尖汛入口過青浦角至泰
壩梁埭場鹽船由時堰入口過青浦角至泰壩青浦角
至壩尙有程途一百二十里是青浦角爲泰屬出場鹽
船之總匯前委試用官二員督率八塘商役循環護運
固屬有裨但八塘俱在何埭場之南其何埭以北尙有
七場路遙二百八十餘里卽南首之富安安豐梁埭等
場出場之鹽亦尙有一二十里至三四十里方歸塘汛
其未及塘汛河內尙無員役催督應飭令各場差役催

內河鹽法志卷三十一
趕鹽船不必拘定上站押至下站惟令廟灣派出之差將沿途鹽船催至新興爲止新興之差催至伍祐爲止伍祐至劉莊草堰小海丁谿何埭等場俱層次而下所派差役名數總視下站鄰場路途遠近船隻多寡酌量差遣彼此交接其何埭東臺原屬毗連兩場差役俱應直趕至青浦角富安差役應趕至安豐安豐差役亦趕至青浦角梁埭另有汊河該場差役應專趕至青浦角前設試用官二員應令一員駐劄青浦角督率青浦以南之溱潼和家莊淤溪天滋廟四塘商役將各場匯歸鹽船催趕至泰壩空船催趕至青浦角青浦以北鹽船

既有各場差役按境押送所有原設青浦時堰殷莊大尖四塘商役巡船可以裁減以爲通屬設巡之用查通屬呂四餘東餘西金沙西亭石港掘港豐利等八場鹽船向由岔河關出丁堰口從如皋至海安西抵泰壩柃茶角斜二場鹽船出力乏橋亦由海安抵泰壩海安至壩尙有程途一百二十里是海安鎮爲通屬出場鹽船之總匯應卽將所裁泰屬青浦等四塘商巡船隻移設於海安江堰馬甸天滋廟四塘委試用官一員駐劄海安督率巡緝催運至壩各場日出鹽船亦照泰屬一例令各場差役催趕至海安鎮至泰壩三關八浦爲該壩

提鹽過掣之所並請於下河八塘內調撥巡役十六名
巡船四隻水手八名分派南北兩關之內巡緝秦屬溱
潼等四塘通屬新設海安等四塘每塘巡商一名巡役
二名巡船二隻水手四名統歸秦壩衙門就近統轄委
官二員亦屬秦壩節制

謹按是年七月詳准秦壩添撥淮揚道所轄巡役四
名二十六年詳准裁汰八塘巡商八名二十七年詳
准將溱潼和家莊淤溪天滋廟等隘委員巡役改歸
秦州分司管轄

乾隆二十三年七月運司盧見曾詳緝私各條一三湖應

嚴加巡防也查高郵寶應邵伯三湖均相接連內通場
竈外達大河爲私鹽出沒之巨浸原設巡兵巡役雖屬
星羅碁布不可不特設遊巡應請揀發候補陸路守備
一員撥與巡役四十名巡船五隻駐劄高寶中途之六
漫岡南至邵伯北至黃鋪內蕩外湖往來躡緝仍印給
循環簿令其註明每日巡至某處及所獲大小功績季
終由司彙冊轉呈查核一大江請設紅船會哨也販私
船隻由長江透越者或乘飽風或施快槳隨潮直上日
不停泊夜宿蘆洲請發候補水師守備二員每員給以
巡船水手各撥巡役十名使上而江甯中而儀徵下而

三江一往一來遊行江面遇有私船放鎗爲號招呼沿江營汛協拏一儀徵之透漏宜專員巡緝也儀徵爲江廣引鹽掣摯改捆之所拋散旣多偷爬不少見據六合商人稟稱儀六交界私鹽出沒南北中三路而陳寶橋適當其中可以控制請於此地揀發候補陸路守備一員巡役三十二名統領巡緝均按半年一換又查明長江隘口圖山關爲上下船隻必由之道詳請派水師候補守備一員給與巡役十名紅船一隻巡船一隻小快船一隻在江遊巡自儀徵至太平洲爲一汛至前設守備二員原議止令上至江甯下至三江營來往遊巡

今查上江一帶引鹽口岸如太平無爲等處多爲江私
侵害請再添蕪湖關遊巡船一隻所有委備一自蕪湖
無爲州以至江甯爲一汛一自江甯至儀徵之沙漫洲
爲一汛仍令各備往來會哨並各給小快船一隻爲偵
訪走信之用均經督撫鹽政批允

乾隆二十三年十月運司盧鳳曾詳查洪澤湖一帶走私
處所以老子山爲扼要而劉家嘴與臨淮口其別路也
老子山係清河縣地界舊有清河營汛兵五名不足以
資捍禦應請遴委候補水師守備一員再調撥清河營
兵丁五名並撥巡役二十名巡船二隻交與該備督率

巡防其劉家嘴臨淮口係泗州地界請另委候補水師
守備一員於泗州營撥兵五名並撥巡役十五名巡船
二隻交與該備督率遊巡均按半年一換以均勞逸再
查老子山雖係清河縣所轄距縣水旱均有二百餘里
嗣後弁兵捉獲功績卽令就近移交甯胎縣審詳更爲
便捷經總督尹繼善鹽政高恆批允

乾隆二十四年正月運司盧見曾等會詳乾隆五年間江
蘇臬司等因醃切一項黠商猾販向借貨七鹽三拌合
夾帶每多影射興販詳定每貨一擔准帶護鹽十五斤
通飭遵照在案伏查醃切本與興販相聯難免梟徒藉

名影射若再給以護鹽沿途兵役既難查考即使查出逾額又得藉詞牽混請嗣後於未醃切之先責成場員將某客貨物應領鹽斤逐一查明載入冊內按月呈送查核俟醃切既就卽以印照載明貨物斤重倘遇生潮每貨一擔許該客商在於沿途官鹽店內執票酌買二斤以禦潮溼概不准帶護鹽倘有隨貨帶鹽出場卽行究治場官參處至醃切各行最易蔽私並請給簿查對倘遇夾帶出自某行卽將該行戶一併治罪經督撫鹽政批允

乾隆二十六年三月鹽政高恆批准運司盧見曾詳秦州

逼近場竈港隘繁多原設巡役七十五名水手三十名
巡船十五隻分派天池隘陡門隘陳家渡沈家渡西所
嘴南門隘周家鋪馮甸隘姜堰鎮白米鎮青平港海安
鎮寺港口廟灣鎮劉林巷十五隘每隘派設巡役五名
水手二名巡船一隻茲查天池隘另有泰壩委員所管
巡役二十名陡門隘姜堰鎮均設巡商巡役馮甸隘海
安鎮在上四塘之內現有委員督率巡緝以上五隘所
設巡役二十五名水手十名巡船五隻均可裁汰餘隘
仍循其舊又江都縣於雍正十年題設巡役三十九名
水手十八名巡船九隻分派尤家渡童城鋪大馬橋斗

門灣黃港莊家橋九龍橋三汊河瓜洲四閘等隘巡緝
茲查斗門灣九龍橋三汊河三隘見有商役巡緝應請
將縣役十一名水手六名巡船三隻裁減又督緝頭役
向設四名今二名足敷差遣應裁去二名又甘泉縣題
設巡役四十八名水手二十名巡船十隻分派瓦窰舖
邵伯南壩北壩露筋祠腰浦滌洋湖新塘河丁溝橋墅
永安汛黃板橋廟頭陳家集月塘集等十四隘今查運
河至灣頭瓦窰舖並邵伯南壩至六閘一帶見設商役
巡緝又北壩亦有專設弁兵應將縣役十六名水手八
名巡船四隻裁汰其黃板橋廟頭陳家集月塘集四隘

均係陸路設役尙少請各添二名以資堵緝又寶應縣濱臨溪湖爲私販之咽喉雍正十年先後設立巡役四十名水手十二名巡船六隻分設白埭湯董莊決溪莊蘭亭莊射洋莊蜆墟顧家莊吉小埭望直港運河八淺黃鋪洪濟閘泥甸汜水莊界首莊丁甯莊白水塘銀港集黎城鎮等處隘口巡緝今查黃鋪洪濟閘汜水界首四隘見有守備遊巡所派縣役八名應行裁汰又山陽縣東接馬家蕩有場竈透漏之私北臨黃河有河北偷渡之梟且爲引鹽掣摯之所向設巡役二十八名水手十四名巡船七隻在於仁義窪利濟橋程公橋頭二鋪

黃鋪楊家廟周橋岔河口平河橋車橋流均溝等十一
隘查緝今查黃鋪見有守備遊巡流均溝係與鹽城縣
交界鹽邑已設巡水此處無庸重複其應裁汰巡役四
名水手二名巡船一隻

乾隆二十七年四月運司盧見曾詳泰興縣東鄰場竄北
連泰壩南與靖江交界西臨大江是東北爲場私所侵
西南又爲浙私透越向來該縣額設巡役三十五名外
江巡船六隻內河巡船一隻舵工六名水手二十名分
泊沿江各港守禦茲查各隘相去不過五十餘里無須
設立多船應將船役量行調劑請於口岸鎮過船港黃

家港三隘仍各設江巡船一隻舵工一名水手三名巡
役四名會哨巡緝其餘江巡船三隻內河巡船一隻均
可裁汰仍於野汊港等口及南界靖江之處改設小巡
船四隻每船選善於駕駛巡役四名來往梭巡水涸之
際卽令在於陸路巡緝其外江之太平洲陸路之印莊
鎮毘羅市分界莊黃橋鎮古溪莊陳家莊安寺橋等處
將原有巡役分派會哨巡查隸縣西之口岸鎮過船港
黃家港太平洲野汊港者責令口岸鎮巡檢管轄隸縣
南之毘羅市印莊鎮者責令印莊鎮巡檢管轄隸縣東
北之分界莊黃橋鎮古溪莊陳家莊安寺橋者責令黃

橋鎮巡檢管轄再請設立總巡商一名督率稽查以免
各役懈弛經總督鹽政批准飭遵

乾隆二十七年六月運司盧見曾等會詳盱眙縣上接長
淮下臨洪湖爲淮北綱岸之門戶更私鹽侵灌上江之
要路請於馬家壩舊鋪舊縣查家渡四隘各設巡役五
名以資巡緝又私鹽由老子山臨淮口中流偷渡惟泗
州後關最爲扼要向委文武偵緝未收實效應請改委
泗州營千總一員撥兵十二名輪駕號船晝夜堵緝經
督撫鹽政批允飭遵

乾隆二十七年七月兩江總督尹繼善鹽政高恆批准運

司盧見曾詳寶應縣與高郵州界連場竈濱臨溪湖乃
丁溪劉莊伍祐新興等場私梟經由之路不但本岸官
引難銷且可渡越湖西侵灌盱眙天長等各縣口岸該
州縣雖各設有巡役而報功寥寥所有額設巡役水手
應請飭令委巡高寶守備兼轄呼應較靈惟該州縣走
私來路都在水鄉港汊四達委巡守備一員誠恐耳目
難週請於該二州縣各設總巡商一名各給原設巡船
一隻率役分巡各路所添總巡商二名卽歸遊巡守備
管轄

乾隆二十九年二月運司趙之璧等詳句容縣縣丞原派

巡役十五名駐劄白兔鎮督緝浙江惟是路徑錯雜不敷堵禦應請添設巡役十五名再於天王寺南鎮街要隘添撥溧陽營弁一員兵十名駐防堵緝經督撫鹽政批允

乾隆二十九年二月鹽政高恆檄行案照板浦關盤查巡緝事宜業經奏准歸併海分司管理所有該關原設清書二名聽差四名應行裁汰以節冗費

乾隆二十九年七月戶部議覆漕運總督楊錫紱條奏搜查回空糧船夾帶私鹽章程

一搜查宜有一定衙門也查漕船夾帶私鹽稽查固應

周密而責成亦宜有專司今揚州經過回空漕船既有督鹽二臣委員搜查如果實力稽察自可嚴杜夾帶原不必又須地方文武各衙門兵役紛紛滋擾徒致稽遲應如所奏將揚州鹽廳查鹽專聽督鹽二臣委員實力查辦其淮揚道及揚州將備江甘兩縣籤查兵役一概停止仍令此後糧船一到大幫限以一日查一幫小幫限以一日查兩幫查畢卽行儻有藉口搜鹽故爲羈阻妄稱奉委攔船搜查者飭令委員隨時查察重處一擺列食鹽不應作爲私鹽也查漕運全書內開船戶往返必須食鹽比照民間肩挑背負四十斤易米度日

之例每船於交兌回空處所准帶食鹽四十斤嗣後查
鹽員弁將間有查出多餘鹽斤聲明俱係擺列船頭聽
候查驗每船多不過二三十斤實非夥同興販免其查究
節年咨部辦理在案是查出多餘鹽斤與隱匿私帶有
間但搜查員弁或有喜事邀功混以私鹽詳報者應如
所奏飭令委員等除有販私夾帶查出照例詳報外至
實係擺列船頭聽驗零星稱出多餘之鹽每船不過二
三斤者仍照例將多餘之數入官變價充公不得以私
鹽混報致滋擾累

乾隆二十九年十月署湖廣總督疏言湖北宜昌府與四

川夔州府接壤向來川私充斥大爲淮鹽之累雍正五年設立卡商召募巡役五十名巡船十八隻並移撥兵丁二十名分派查緝復於雍正十三年因卡商非見任官可比遇有掣肘之處請令宜昌府通判率同巡商悉心辦理迨後儻有鹽梟闖卡飛渡巡役人少不能抵禦又於宜昌下游之白洋地方並距郡城上游之南津關添撥巡役三十名守哨船九隻分派堵禦嗣於乾隆二十七年派撥督標候補守備二員宜昌鎮兵八十名分駐平善壩南津關二處協同盤詰各在案茲以川私仍未絕迹請將宜昌府同知移駐南津關專司查緝第查

宜昌府同知分駐長樂縣屬漁洋關爲舊土司適中之所地方緊要不便改移惟查宜昌府督捕通判關防內鑄有鹽捕字樣是巡緝川私爲通判之專責應請卽以通判移駐南津關下游五里之西壩專司巡緝該處爲自川入楚必由之徑實諸私咽喉所有舊設巡役八十八名應請存留聽該通判於平善壩南津關及下游之白洋地方三處分派擒截至原設巡哨船二十七隻酌留二十二隻以資分設巡查其原設之委備卡商兵丁人員悉行裁撤以節糜費至私鹽案件徒罪以上者仍由東湖縣通詳辦理若徒罪以下卽令該通判分別查辦

又荆宜施道職在分巡應就近督察一切鹽務事宜與鹽道會同核辦如該通判稍有疏防廢弛情事照例詳參再巡緝川私地方文武官弁均有責任應請仍飭宜昌鎮標兵弁東湖縣派撥捕役各就本汛巡查如有川私透越協力追捕查拏一體照例給賞倘有怠忽賄縱情事分別查究該管文武官弁照例詳參如此酌定章程辦理庶緝私更加嚴密部議准行

乾隆三十年十一月運司趙之璧詳准江都甘泉二縣各城門向撥巡商七名巡役十二名查緝私鹽近年以來並無官員督率竟成虛設請專委試用大使一員督率

商役在於各城門巡查截拏以杜私鹽侵入嗣於五十四年鹽政全德據總商議稟十城門原設商役不敷巡查批准每門各設巡商一名巡役二名

乾隆三十年十二月運司趙之璧詳准儀所前後並天池木關長河一帶緝私派委奇兵營額外外委一員船牌二名巡役四名

乾隆三十一年三月運司趙之璧詳准查海州分司原設緝私巡役十六名水手十二名內派永豐壩巡水八名安東壩巡水八名迨安東壩奉裁巡水卽歸併永豐壩委員管轄其工食向由海州分司彙領分給今查各巡

水工食均由該管官考核具領應將永豐壩巡水十六名工食聽該壩自行具領該分司原設巡水十二名又板浦關歸併巡役六名由分司具領以專責成

乾隆三十一年六月鹽政普福奏江西建昌一府額引滯銷請照湖北宜昌府引鹽官爲運銷之例責成該府督率丞倅一員領運行銷奉

硃批覽欽此嗣於三十二年十二月鹽政尤拔世等會奏建昌地方遼闊貿易事繁同知一人難以料理實與宜昌情形不同勢難照辦計惟有以緝私爲要請於新城縣之杉關黃家隘南豐縣之盤湖隘邗都隘廣昌縣之白水

鎮尖峰瀘溪縣之花山界其七處要隘每卡設巡商一名巡丁二十名嚴加巡緝酌給辛資令揚商捐給並責成建昌府督緝七卡之外尙有山僻小徑俱令地方文武會撥兵役一體協緝該同知原有會哨巡查之事應乘便親歷各隘稽查勤惰倘再額引不銷卽係巡緝不力一併嚴參議處嗣於乾隆五十四年江西鹽道恆甯據建昌府等稟該府所屬各卡巡丁並不在卡徒糜商費除萬年橋巡丁毋庸裁撤外其瀘溪縣之花山界新城縣之杉關黃家隘南豐縣之邗都隘盤湖隘廣昌縣之尖峰白水鎮七卡原設巡丁二十名每卡祇留八名

隨同巡緝無須補充其革除卡費扣存江西鹽道庫留
爲有功兵役獎賞之用通詳批允

兩淮鹽法志卷五十九